

貞一齋詩文稿

貞一稿序

夫為大而無當往而忘反之言者必世所謂山林枯槁果於違人之士豈非以其志與若仁義之本風化之原論說必歸儒者而稽之章逢家或反謬是夫士也乃氣必充辭必端馳騁上下橫從今古無不極而約之無踰乎禮其志若是惡可以山林之果者蔽之耶余得上清朱君本初貞一稿讀之未嘗不掩卷而三嘆息也余與朱君游知其文學舊矣來南州君主玉隆別館去年冬行縣田有烏山小兵馳田間得君

寄詩二章蓋六朝庾鮑而唐太白之流也今夏君自西山來示余此稿槩篇百數而槩度若一其武當山賦與巢湖等詩論在詞澹尤吾所謂馳騁橫從而無所踰者其大而不夸徃而知所至與雅頌廢風氣降數十年來鄉之事進取伎者一趨於詩人愈多而詩愈少非詩少也微諸本原則微矣江西號多文邦須在都與同列論是邦人咸獨推某某今又得君君故臨川人也顧又蔽於是是山林者又惡足以蔽君使無知者亦云然耳茲所以資吾掩卷之歎而尚悲其

志也世之觀人者徃徃循名遠實靡然成風將使天下負無士之累於後世其病類如是凡不可而衆說可與而失之者豈特如本初之文而已君論著外此若詩所稱輿地圖書者尚多謹先歸此稿竢休告叩雲谷相與并論之至治三年八月朔臨江范梈序貞一彙叙

為蒙體禦寇之學者超然脫離塵滓恢廓胸臆欲與天地無際其智豈不能知踐平實遵槩度之為中若是者蓋亦激於卑陋沒溺之累而不自知其為賢知

之過也有人焉得其清虛廣大者而寄跡焉以行吾  
平實樸度之素則其於道何如哉吾友朱公本初故  
禮義家厭世溷濁霞裾星弁訪歷名山大川與太初  
溟滓游於無窮而嗜聖經史傳諸子百家若飢渴然  
入與元德大宗師留輦轂下交當世偉人魁士聞見  
滋博暨主教王隆余來江右始獲盡窺其稿名貞一  
者如泉涌石竇日挹日新如雲幻晴峯愈變愈麗比  
興序論粹乎儒者昔人言天上無凡俗神仙世無仙  
則已有則必通古今盡心性如吾聖賢聖賢不作仙

亦未之見豈人心沈溺不獨吾遊方之內為然耶自  
鴻儒代作統緒復振孔氏之道昭若發矇矣本初一  
榻林下內境虛曠中夕夢回松月在窓夜氣聞然全  
體豁露于斯有得則顧是區區者又將有不屑焉者  
矣余安得從君抵掌跋燭根極指歸以會貞一之傳  
芻狗陳言相視一笑至治第三襖倉龍癸亥中秋友  
人眉山劉有慶志善父謹叙

朱鍊師文集序

勤者為學之本也士而或怠能有進焉者否也曩遊

京師獲識本初朱鍊師於環樞堂下讀其詩則排體  
五言學工部長句與文則馳驟老坡間時本初已四  
十餘以道法承應中朝日不暇給然省其私稍有餘  
力則卷不釋手夜讀由乙至丙以為常吾固知其必  
將有進也久之文進於韓復進於選迄今十有餘年  
其所進方未已也吁勤矣經生曲士自少至老役役  
事窠臼語言或者不知蘓為何文杜為何詩者有矣  
况老氏學者歟况韓與選歟壯得志而自畫者有矣  
况四十五十歟本初大父以科舉仕宋至淮陰宰抑

其家學有所從歟環樞尊師以清靜佐化理文采動  
公卿若漢蓋公唐吳筠者本初出入贊襄其間而有  
所講益歟不然顧其所學之勤之進歲異而月不同  
者又何歟後之為學思有進者展讀茲卷知所勉矣  
雖然猶有望也伯陽君曰上士聞道子貢亦謂不可  
聞者夫子之言性與天道愚故於此猶望其終進於  
道文章云乎哉本初名思本朱姓臨川人學道龍虎  
山中貞一其號云至治癸亥十月甲子臨江歐陽應  
丙書



貞一稿序

集與朱君本初相從於京師廿有餘年矣每見其酬應之暇即自洗滌以讀書為事其書既不汎雜讀之又有其道集甚敬焉至於職方之學尤所偏善遇輜軒遠至輒抽簡載管累譯而問焉山川險要道逕遠近城邑沿革人物土產風俗必叅伍詢詰會同其實雖靡金帛費時日不厭也不憚其心不止其治事也討論如議禮嚴分若持憲立志之堅確精敏類如此施之功業必不苟且循習而已然既從事道家之學

不屑於世用乃折而托之文章宜其過人之遠哉嘗  
以所著貞一橐示予俾題其端予讀而歎之曰善哉  
慎所當言而不鼓浮夸以為精神也言當於事不為  
詭異以駭觀聽也事達其情不托蹇澁以為奇古也  
情歸乎正不肆流蕩以失本原也若是者固足以名  
家也乎集嘗聞為老子之說者曰欲靜而不躁也重  
而不輕也容而不苛也畏而不肆也紓而不蹙也嗇  
而不蕩也迫而後動不先事以為必審而後言不隨  
物以成妄若是者豈止於為文而已乎本初蓋得之

矣而集以為言誠知而不能者也本初尚有廣予者  
乎觀其書者試以集言求之泰定二年四月八日承  
德郎國子司業蜀郡虞集伯生甫書

貞一稿序

吾嘗怪夫言出於聖賢者謂之經出於諸子百家者  
謂之書均是言也經與書何為而別乎道有隆汙言  
有精粗非人之所能為也經書之分故判然若天之  
尊地之卑高下之位確乎其不可以相踰也秦漢諸  
人刻意詞章以專門名家樂毅李斯屈原司馬遷班

固楊雄之流號稱獨步雖然以擬諸經可得乎臨川  
朱本初儒家子也為黃冠與予同道居龍虎與予同  
山處京師與予同 朝雅志詩文與予同好予長於  
本初四歲則其年之相若也予自四十來言語詞章  
漸刊落而無為非無為也吾聞諸教父曰為道日損  
損之又損以至於無為無為而無不為矣今觀本初  
示予貞一齋稿其文皆四十後作而用志方銳也用  
志銳則學日益矣損與益二者又不可同日語焉或  
者曰本初其亦良賈之深藏者歟方其處山林也則

以損及升於朝也則以益蓋山林以道相高而朝廷以才學相雄長本初又不得不資益之道以自混其處焉亦孔子齊人之獵較也若是者又豈吾之所望於本初乎孔子曰行有餘力則以學文是則本初之志哉不然予與本初又何以為居同山處同朝身同道而志同好也惟其同故本初之文欲徵予言而為之序為之序而不言其所以同者又豈本初之所望於予哉予故曰道有隆汙言有精粗非人之所能為也若是者本初其將有同見歟抑將不歟是書

為貞一齋文稿敘泰定四年歲在丁卯四月八日丙  
子元教大宗師吳全節書

貞一藁序

言行之在人動之形也惟其動而不離乎正則有言  
焉而為文辭有行焉而為德行動為之用靜為之體  
也然其所以歷萬變而常存者以其貞於一而已耳  
非夫樂天趨時而純體乎易道之淵微者則動於言  
而言為詭辭動於行而行為怪行或不免焉矣老氏  
之學蓋原於易然而疏之為莊周列禦寇庚桑楚計

然尹文子之流其刻意尚行有不待言而至於動爲  
文辭又皆離去垢濁而適乎清虛疊疊然斐斐然進  
於易之幾神所謂貞於一云者真足以括天下之動  
而無違其與觀乎天文人文者固有合哉臨川朱君  
本初是嘗寄跡老子法中所謂遊方之外者也居京  
師多從公卿大夫遊比年奉將使指代祀名山車轍  
馬迹半天下矣每情與景會轍形之篇什有風人咏  
歎之思而無山林愁悴之音南歸專席玉隆因即其  
齋居之名而題其彙次之編曰貞一稿懿夫體易之

言予嘗讀易而知動之為動蓋風行水上其卦曰渙  
渙者天下之至文也因其有行而文始生焉非其動  
之所形能致然乎故水之靜者為淵而動者為波凡  
其大波之浩渺小波之瀟沅者風觸之耳而水固不  
知也不知故一一故能貞然則君之所以貞夫一者  
雖形之於動而實未嘗不本於靜也予非知詩者而  
知君體易之意深矣迺為之評曰君之詩似吳宗元  
元丹邱而遠遊之跡過之君之自得似葛稚川司馬  
子微而頤神坐忘之妙需其至焉返之於靜以知終



終之此顯道神德之能事而貞一之極功也予之視  
君其猶龍乎何可及哉何可及哉東陽柳貫道傳父  
序實天歷紀元之歲十又一月之丁酉也

貞一稿序終

貞一齋文

臨川朱思本本初父

武當山賦有序

僕以大德癸卯至大已酉一再遊武當其山水之勝仙靈之迹聞見雖習而賦詠莫傳往來于懷益增茲歎蓋懶與拙并無以發其興境與神會斯能屬其辭理則然也延祐四年春夏之交由梅溪超五龍過南巖登大頂下元聖宮經福地橋出九度澗宿留久之周覽



晚狡獪之蹲踞叻哈呀兮欲噬翮聯翮兮未舉變怪  
百出瑰詭萬狀應接不暇心目惘恍乃經北麓陟春  
阿振衣兮先登乘風兮浩歌俯梅溪之清駛瞻五龍  
之差莪長松鬱以交錯巨石憂其磊砢既冒險以徐  
行亦逢夷而屢憩羨麋鹿之優游喜獐獐之儇利羗  
吾行之蹇拙眩嵌石而驚悸彼荷篠之丈人何乘危  
而掉臂爾其出幽谷臨飛橋簫風磴凌山椒豁蒙蔽  
空泐寥驅屏翳乘招搖山靈肅以前驅雨師紛而清  
道振鼓鐘之鏗鉤耀旌幡之紛倒朱門豁兮洞啟金

碧輝其相冒厥有至靈尊臨大庭鎮北配水虛危之  
精披蒼髮兮儼服隱元旄兮翠於龜蛇盤蛇以著垂  
風霆揮霍以流形仁存不殺功極扞禦時暘而暘曰  
雨而雨忠者致於君王孝者盡於父母斯作休於邦  
家亶聰明曰元武元為天之正色武有止戈之文三  
月三日為神降生於赫

元后同符茲辰爰封香幣歲致明禋開

聖壽於無疆與茲山而匹倫播元風於廣宇溥嘉惠  
於生民紀盛事於穹碑有吳君之所云若乃循山而

東窮極荒遠探黑虎之幽岩逐青羊之芳磻紛藤蘿  
於木杪強躋攀於分寸類太白之危途殊王陽之峻  
坂歌竹枝之到退甚木皮之流汗陰木蔽日元蟬噪  
風名花異石錯落其中珍禽奇草時躍時從方瞳綠  
毛白叟黃童餐霞之侶采藥之翁亦徃徃而相逢何  
南巖之奇詭隱靈蹤之烜赫聳曾樓之十二列威神  
之五百岩崖炳其相輝丹青點以無色下臨不測之  
淵上有試心之石歛冉冉兮上征撫曾臺之遺迹敞  
洞府之幽深閤雷聲之淵默鬼怪潛藏陰陽著靈紫

霄展旗三公九卿金鎖獅子疊字大明綵以崇墉簇  
以畫屏晝則祥雲隱空天風流鈴萬籟並作宮商和  
鳴夜則素月交暎天燈熒熒迸若飛電飄如流星亦  
時顯而時冥爾其衆峯之尊粦有大頂中啟洞天迥  
絕塵境皇屋極風羣帝所領下包渾淪上徹溟滓轉  
岩隈而仰視極霄漢以彌高梯絕壁之峻嶒凜方壺  
之巨鰲抱琪樹以返顧淙赴壑之驚濤恨羽翰之無  
從約飛仙以遊遨歷天門之九重乃平平而蕩蕩諒  
無階而不升砥瑤壇之尋丈俯烟巒之萬疊競奔騰

而趨向擢金莖與玉筍盡殊形而異狀謂天蓋高於  
茲逼焉有仙則名於茲息焉於是徙倚徬徨俯仰周  
旋感雲輶之來下冷風馭之翩翩授以長生之訣畀  
以青瑤之編慨塵緣之未息乃稽首而言還遵彼故  
途載行載止飛泉冷泠萍蘋草薶靡飄飄兮襟裾逶迤  
兮芻蕘曾晝景之未移已屆乎南山之趾徒觀其希  
夷故隱丹竈苔封標名福地樓殿玲瓏寶奎文之璀  
璨表元聖之新宮蓄泓泓之明鏡卧沉沉之雄虹澗  
曲折兮九度雲晻曖兮千重若乃異人之所廬神物



之攸虞裂石室之髓垂瑤珠之露風雷之變化山君  
之呵護蓋未得窮探而悉舉也高情渺然蒼山相摩  
呼吸之氣想通帝座遡風援筆而為武當之歌歌曰  
蓬瀛雖異遼海隔兮崑崙雖大邈西極兮未若茲山  
峙中國兮斂福錫民昭 聖德兮繫神之都於皇赫  
兮祚我 皇元千萬億兮

登武當大頂記

延祐丁巳四月壬寅蚤作自武當山真慶宮登大頂  
初穿林莽尋微逕可五里所碎石磽确壞木從衡逕

漸湮蕪乍升乍降萬木交錯葉或大如箕或小如蒙  
茸或直上數十百尺或樛櫨扶踈皆昔所未見質諸  
野人亦莫能盡名也復多花蛇土蝮聞人聲輒趨避  
惟山蛭尤病人藏敗葉沙土中着屨即蛭螞而上初  
如毛髮既飲人血彭亨徑寸長倍之故行者每數步  
必自視其足見亟抉去否則流毒為瘡痂非旬月可  
瘳蓋山蛭多噉巨蛇鱗甲中螫人非水蛭比也又七  
里所緣青壁攀藤蔓而匍匐登返顧嵌巖幽深草木  
蔥蒨惟聞水聲淙淙莫能窺其底也咳唾笑語山谷

響應怪禽飛翔大如雞鷲小如雀鷁光采絢爛鳴聲  
清越非所嘗聞強以其聲之似人言者名之則有不  
空中空尤為異焉靈草敷榮多黃精芴藟草烏大黃  
之屬又七里所至下天門峭壁如削薜竹繁其顛絕  
而下約可六丈餘側足石磴間援竹而上始也懼而  
顛中也勇而奮既至也則恬而嬉天門砥平可尋丈  
兩石對立上合而中通謂之門亦宜至此山蛭虵虺  
皆無所見矣山誌云是為太安皇厓顯定極風二天  
帝所治復上五里所為三天門其勢視下天門差平

夷而從廣倍之喬松怪石天風冷然長蘿卷舒芬芳  
襲人過此以往無復甚峻亦繚繞百轉又數里乃至  
絕頂礱石為方壇東西三十有六尺南北半之中冶  
銅為殿凡棟梁牕戶靡不備方廣七尺五寸高亦如  
之內奉銅像九中為元武左右為神父母又左右為  
二天帝侍衛者四前設銅缸一銅爐二缸可盛油一  
斛燃燈長明爐一置殿內一置壇前四望豁然漢水  
環均州若衣帶其餘數百里間山川城郭皆髣髴可  
辨俯視羣山盡鱗比在山足千態萬狀如赴如挹如

聽命待役焉者天宇晃朗風景凌厲或云率以五鼓東望日出尤為奇觀則又知非徒泰山天壇衡嶽之為然惜怯露宿未暇驗其說也盤桓久之乃逡巡而返至真慶午陰微轉大率為里僅三十而真慶下至分道口平地又二十有五里云

故榮祿大夫大司徒饒國吳公誄

延祐六年夏五月二日丙辰榮祿大夫大司徒饒國吳公薨嗚呼哀哉哲人云亡民將疇依悠悠蒼天胡不慈遺嗚呼哀哉生必有死此理之常五福既備令

名孔彰先民所稱死而不亡行由謚顯德以誅揚爰  
託旒旗庸寫憂傷其辭曰

伊昔太伯至德作吳綿綿洪緒實基厥初猗歟番令  
美化宏敷漢祖錫封長沙是徂廟食于番世遠益崇  
昭穆繁昌令聞攸同自公二祖積行在躬養潛樂幽  
食報宜豐逮公顯考奕葉彌芳持平閭里言不否藏  
宜顯而隱孰云不揚篤生我公乃熾乃昌岐疑其姿  
貞固其操學探淵源理窮旨奧溫兮如春時雨斯膏  
肅如秋霜匪怒伊教禮賢下士汲汲孜孜揚善掩惡

遐邇寔師仁親為寶勞謙自持不矜於人無競惟時  
年踰不惑喪亂式逢東西震驚大小哀恫不恒厥居  
視天夢夢屹然自守亦惟我公自守伊何潭潭公府  
義以為門仁以為宇莫之或欺孰予敢侮天道無親  
善人是與惟公仲子實掌元門善服明訓有德有言  
奉祠桂館慶會風雲於赫四朝恩數駢繁位以貞人  
表以元德永言孝思蒿高維則間歲歸省莫匪帝力  
疇昔之歲公及希年 錫命元德束帛交綬侑以上  
尊乘傳言還僉曰休哉公則慊然碩德升聞誕膺

明制玉堂虛席以企以俟 武廟龍飛益隆孝治擢  
拜司徒位亞三事即家開國瑞慶大來公與夫人寵  
命寔偕上及顯考爵同秩異葉茂根榮流長源遠延  
祐之初公壽八旬故若稽故典惟帝時遵 帝曰俞  
哉申錫惟均明明元德載馳載驅式燕以衍承顏悅  
愉名動中朝榮耀鄉閭桂襲其芳蘭森其玉簪笏滿  
堂雍雍穆穆五福攸敘惟公備足永錫難老齊老逾  
難公與夫人攸處安安天爵斯崇如陵如山曰惟晚  
香堂匪虛構鄉以祿名惟天所授里曰具慶地同恩



厚嗟嗟松柏歲寒彌貞仁者必壽宜享百齡如何寢  
疾遽夢奠楹嗚呼哀哉木落山頽天降時喪悲風興  
感零露方凜走獸狂顧飛鳥失翔嗚呼哀哉昔公之  
存邦人寔依如彼河山以潤以輝如彼鸞鳳是則是  
儀今公徃矣云胡不悲嗚呼哀哉嗟嗟諸子痛哉奈  
何元德純孝淚如懸河五內崩摧孰知其他燕吳萬  
里長路漫漫欲濟無梁奮飛無翰踴踊哀號靡有夜  
旦帝閔其衷驛傳斯卑乃命奉常易言定謚慰彼  
孝心以勗有位僕之於公東西其州生髮未燥景行

前修少長學道息影丹邱乃遇元德雲涌龍游拜公  
於堂職由師故溫溫其言循循其度佩公之訓感公  
之遇云何六年俛仰今古堂堂遺像目想心存琅琅  
德音胡可再聞不弔昊天殞鳳摧麟嗚呼哀哉日月  
遄邁靈輜既遷翩翩丹旄於彼山田素驥悲鳴黯若  
新阡嗚呼哀哉嗟予小子承諱驚惻目短淒風魂飛  
涼月百身莫贖寸心如割矢辭告哀永慕增怛嗚呼  
哀哉

輿地圖自序

予幼讀書知九州山川及觀史司馬氏周游天下慨然慕馬後登會稽泛洞庭縱游荆襄流覽淮泗歷韓魏齊魯之郊結輒燕趙而京都實在焉繇是奉

天子命祠嵩高南至於桐栢又南至於祝融至於海徃徃訊遺黎尋故迹考郡邑之因革覈山河之名實驗諸滄陽安陸石刻禹迹圖樵川混一六合郡邑圖乃知前人所作殊為乖繆思構為圖以正之閱魏鄺道元註水經唐通典元和郡縣志宋元豐九域志皇天一統志參考古今量校遠近既得其說而未敢

自是也 中朝夫士使于四方冠蓋相望則每喁以  
質諸藩府博采羣言隨地為圖乃合而為一自至大  
辛亥迄延祐庚申而功始成其間河山繡錯城連徑  
屬旁通正出布置曲折靡不精到至若漲海之東南  
沙漠之西北諸番異域雖朝貢時至而遼絕罕稽言  
之者既不能詳詳者又未必可信故於斯類姑用闕  
如嗟夫予自總角志於四方及今二毛討論殆遍茲  
其平生之志而十年之力也後之覽者庶知其非苟  
云

北海釋

四海其東與南者密邇中國人得以耳目接也西海雖遠在數萬里外而驛使賈胡時或至焉惟北海不聞所在孟子云伯夷辟紂居北海之濱是則指古之孤竹秦漢之遼西今之永平而言實東海也今考夫大磧以北金山之東水皆北流赴大澤中大澤綿亘萬里蛇龍居之蒲葦生焉舟車不通故莫有絕澤而北者然則大澤之外海之遠近不可知已金山之西水皆西流經諸藩絕域咸會於西海云

和寧釋

和寧即哈刺禾林乃 聖武始都之地今嶺北行中書省治所常以勲舊重臣為之外則諸王星布綦列於以藩屏朔方控制西域實一巨鎮云

八番釋

八番宣慰司都元帥府治順元統八番安撫司番各有府州軍名復有順元宣撫統蠻夷部落長官十數處播州宣撫統黃平府思州宣撫統鎮遠府又各有部落長官萬蠻都雲永順南丹安撫金筑府又各有

所統州縣部落長官無慮數十百處皆溪洞險阻地  
窄而名猥多茲得以畧

兩江釋

邕州之西曰左右兩江北接八番西抵雲南南距交  
趾地方千里列田州來安鎮安思明太平路軍民總  
管府分統州五十餘縣二十餘絕長補短州不能百  
里或一二十里皆溪洞險阻非有城池兵甲又非有  
貢賦之益徭役之奉也地窄而名猥多茲得以畧

雷說

雷之興隆隆焉其甚也轟轟焉號號焉其震於物也  
奄焉以滅靡焉以碎不疾而速不見而彰其為神也  
審矣世之言震於人者則曰是為惡者惡稔帝怒故  
使震之予曰不然今夫牛馬畜獸蠢然無知或震焉  
是不必為惡而後震也或曰此釋氏所謂輪迴果報  
者昔嘗為人惡未罰今其形獸也心固人也故震之  
予曰是大不然今夫木石偃然無情或震焉又豈為  
惡輪迴者耶人之生百行莫先於忠孝世之不忠其  
君不孝其親滔滔者皆是曾不斯震顧乃反無知之



畜獸無情之木石耶是必不然也然則其震於物者  
果何為者耶予曰雷者陰陽之氣磅礴奮激固天地  
之怒氣也惟人與獸或感惡氣以生復丁是氣震以  
滅矣木石則適遭其逢耳作雷說

擇交銘

蛇毒有形觸之斯至鴆毒有名飲之斯斃弗觸弗飲  
雖毒莫致人而不仁甚於茲類輕言托交蘊毒孔熾  
妒婦是媒狡童是肆我心坦兮寧不斯畏戒之戒之  
書紳以識

故保和通妙宗正真人徐公行述

公姓徐氏諱懋昭字德明世為饒之餘干州社林里人曾祖某祖某父某俱以儒名家積善所鍾至公而顯公生於宋淳祐庚子總角就學通經旨知古今事即喜讀道書訓以舉子業則曰是假聖人之言為干祿之舉非吾事也弱冠父命之娶輒不樂或數日不食乃從其志為老氏學今贈通真觀妙元應真人松隱張公時管轄信之龍虎山上清宮道愈著聞遂俾公從之游松隱公見公風骨不凡即命師今開府儀

同三司輔成贊化保運元教大宗師特進上卿志道宏教沖元仁靖大真人知集賢院事領諸路道教事張公數年學成著道士服寔宋之咸淳戊辰也既而遊衡廬名山遇真人授異書能役鬼神致雷雨祭星斗弭災沴所至人迎候之唯恐不及宋故相古心江公碧梧馬公尚書東澗湯公皆以道學名世少所許與公出入其門獨加禮異時人榮之至元丙子開府公從三十六代天師應詔入覲明年天師還山開府公留侍闕下又明年公遠來省侍留二歲亟請

歸且曰以清靜無為之道佐  聖天子致太平某不  
如師棲遲林壑笑傲煙霞師當無以奪某志遂翩然  
而返綸巾葛屨上下仙巖山水間搜奇挾勝將構別  
館為報上計久之得仙源馮氏宅撤舊而新是圖越  
□年落成棟宇翬飛金碧輝映象設精嚴鼓鐘森列  
視龍虎諸別館為傑出名之曰仙源觀居無何又得  
故里張氏宅易為觀亦如之名之曰神翁大殿之東  
廡為祠堂歲時享祀其先世示不忘本也又以符水  
濟人獲報禮則為觀置恒產積穀至數千萬斛人或

請之恬不以為意值歲薦飢饒信之民無所得食公則出穀貸人或值以遺之全活者無慮數百千計未幾仙源神翁俱被 璽書庇衛公乃分命其徒主之往來徜徉其間以開府公所授宗旨覺悟後進參以儒術品節之故其徒皆穎異秀發卓為道門師範大德士寅 制授提點常州通真觀事錫號保和通妙崇正法師公陞坐演法常之人爭先快覩聞所未聞觀恒產不腆公均節委積權其贏為構玉皇閣皆前所未有也皇慶改元 制加保和通妙崇正真人仍

主通真觀公拜命喟然歎曰大名之下不可久居况  
黃冠野服之人敢冒是以爲榮乎是歲來歸惟以琴  
書花木自娛餘一無所問延祐丁巳開府公壽及希  
年公入侍逾月告別曰師好佳上國彌千二百壽  
某歸老故山不復關人事矣至治改元春走介致書  
開府公中多微辭意復慷慨且囑元教嗣師吳公全  
節以報國事師爲第一事大類訣別語夏五月庚  
寅居仙源文室以微疾屏藥餌越三日癸巳脩然而  
化春秋八十有二遠近聞者悲愴曰是呪符水以衛

我者是儲穀以食我者今亡矣夫公天性孝友恭儉  
事師如父待其徒猶子雖命為真人秩視二品以開  
府公為之師其徒登金門綰銀章者層見疊出公恬  
處其間草衣木食無異昔時戶庭授受語默以道森  
乎其相承煥乎其相輝人莫能窺其際也不齷齪為  
世俗小謹居鄉里未嘗乘馬齒益老步履如飛接姻  
朋尤稱信厚人有急力振之或悖理傷道必奮怒揮  
斥改而後止人亦憚之而不敢為也嗚呼古之君子  
道德充於內仁義施於外致君澤民故天下後世聞

其風而景慕之今公寄迹老子法中道德備於身光  
於山林仁義行於家化於鄉閭而不求知於當世豈  
易之所謂肥遯者歟高第弟子法師雲石李公立本  
嘗事開府公於京師徒孫今贈粹文冲正明教真人  
秋岩陳公義高事 晉郎著名當時皆先公遺世為  
徒孫而雲仍系之者某某以某年月日奉冠劍藏於  
某鄉里將乞銘於世之大君子謂思本為開府公門  
生且知公最詳俾述其行思本辭不獲已敢撫事實  
次其顛末為之狀云謹狀至治元年七月九日成德



體元貞宏遠法師杭州路元鈔觀住持提點朱思本  
狀

祭元六大宗師張上卿文

同盧芳迪  
趙嗣祺

呂震亨  
李師周  
唐桐雲  
陳泰初

維年月日某等謹以清酌庶羞之奠再拜頓首敢昭  
祭於故開府儀同三司上卿輔相贊化保運元教大  
宗師張公之靈嗚呼我公生有異質道德昭融威儀  
靜謐夙遇世皇訏謨密勿清靜無為民以寧壹歷  
事五朝恩寵如一手提元綱措之安佚扶視台司  
乾乾夕惕曰慈曰儉動罔不吉宜逸而勞匪作奚述

中歲投閑得請 武廟授大弟子俾嗣宗教濯濯其  
英煜煜其耀道統有傳寧赫斯燭孰休而浮孰寐而  
覺七十四年坐觀元妙脫屣塵寰恭帝之召白雲在  
天笙鶴長嘯哀哉斯人誰能不弔某等逃儒學道景  
行真風拜公於堂寔開顓蒙晶熒秋高姁媮春融逾  
三十年燕鵲蛇龍仰公之德如山之崇懷公之恩如  
水之東今公徃矣弟子曷從式瞻仙旂廣漠長空寄  
哀斯文追慕何窮

送李士元秀才遊學序

士生乎今之世不汲汲於進取惟懼乎德之不脩學之不講者是可尚已至治三年有司遵舊制舉進士凡明經義工文辭者莫不奮迅鼓舞由里胥籍其姓名行業上於縣大夫縣大夫上于府州守府州守上于省憲二府乃就試焉二府定其可舉者升于朝禮部總諸道之所升更考試之加察詳焉拔其尤者以貢於天子中書定其差等而官之不十年服金紫者前後相望去賤貧而即貴富無先於此途者宜乎為士者遇斯時而奮迅鼓舞也盱江李生士元

挾策西遊訪思本於玉隆覩其貌粹然接其言溫然  
得其所為文雄深閎大博雅奇正其辯明其旨遠非  
潛心聖學未易到也以是而取高科不啻俯拾地芥  
方且僕僕行後邈乎不以為意是豈異於人情哉生  
之言曰昔者顏曾大賢得聖人而師之樂乎道不以  
窮困嬰其心足乎已不以利祿移其志吾心誠慕之  
吾將遍遊大人君子之門又惡知乎無進吾以道如  
顏曾之遇者耶嗚呼生可謂志於道者矣方今  
聖君賢相求賢如不及若生之才其不遺於山澤也

審矣於其行姑以是贈

星命者說

世有星命者流其法列十二宮定太陽躔次以人之  
生時從太陽宮推知命緯之所在又推而知限之所  
至其主則日月五星益以羅喉計都紫炁月孛曰十  
一曜推其躔次喜怒命限值之而知窮通壽夭焉謂  
之五星以人之生年月日時配以十幹十二枝由始  
生之節序先後推而知運之所值五行生尅旺相死  
絕而知吉凶禍福焉謂之三命挾斯術以遊於通都

大郡下至閭閻田里比比皆是也予客京師十有五  
年所見名動公卿者數人自謂人之死生得失悉能  
前知斷以年月無毫釐少差薦紳交相薦譽招致賂  
遺殆無虛日輕裘肥馬光采照地由是而獲祿仕者  
有之時予居道宮甚無事旦夕與之遊處因舉平昔  
所記貧富貴賤存沒年命凡數十以質之十不一驗  
焉予固疑之久而得其說焉其見過於公卿也推之  
則曰某時遷某時相某時受上賞壽八十餘若干  
或踰七十其見接於常人也推之則曰某時獲財某

時成名某時大顯壽如前所云聞者莫不欣慰歷歲  
時間數十百人中幸而有驗者則奔走相告語曰某  
術士神人也由是而名聲日彰遊從日廣其不驗者  
問之則曰今雖未驗當在某時其人益信之日夕延  
頸以俟至期復不驗問之則曰非吾術之疎也若生  
時之誤也或語他人曰某之命貧且賤或不能至大  
官問予以富貴何時予嗤其不自量也懼其怒且罵  
也則姑應之曰某時富貴今而不驗乃求之於余余  
豈司富貴者哉公卿歲有誅者死者謫者左遷者咸

未聞其前有言焉及是而問之則曰吾固知其然也  
彼方赫赫有位吾其敢昌言以賈禍哉聽者不察遂  
以為神嗚呼雖其挾詐規利亦患得患失者有以成  
之也患得者惟恐其言之不吾與患失者惟恐其言  
之不吾固遑遑焉汲汲焉惟命之推術者揣知其如  
是則累千百言以諛之其既也驗者恒少誕者恒多  
少者揚之多者藏之為之者則洋洋然自得而無愧  
矣然則其何以矯之曰君子居易而已

荅族孫好謙書



來書云今秋又不復就試非有他見求異於人知命之窮而安之耳辭意詳雅勤勤懇懇惟以進德脩業為事此誠求益者非欲速成者求之於當世未易多得况吾宗乎數十年來吾宗衰微倒指男子不滿百人親筆硯者僅十數人陽初兄種學積文雄深博雅年踰七十其無意於人間事固所宜然雲章弟家學有傳聲華籍甚居貧不能自振年少而行純業精而貲厚者惟好謙耳

仁宗皇帝即位之七年 詔天下舉進士好謙實與

是選明年戰藝於京屈於人而歸延祐七年 聖天

子龍飛策進士如舊制予留京師意好謙必遂成名  
後聞好謙以星命者言運限未通不就試予甚疑之  
去年南歸相會時不復以往事為詢今詳來書所謂  
命者果性命之命歟抑星命之命歟若性命之命則  
遊於草廬先生之門十年講之熟矣若星命之命斯  
惑也已夫星命之說始於唐李淳風袁天綱言人休  
咎若合符契自是寥寥七百餘年豈天生二人亦猶  
麒麟鳳凰千百年乃一見耶今之星命徃徃揣度附

會以媚悅於人以圖利其身人所趨則譽之人所背則阻之所謂吉凶禍福如響者求十一於千萬吾未之見也昔柳渾童少時有神巫告之曰若命夭且賤爲釋可以逭死位祿非若事也渾父兄俾從巫言渾曰性命之理聖人罕言巫何盡之學益專卒爲唐名相終上壽世祿不絕此已然之事也好謙知足以明理學足以別僞於星命之說奚信之深守之篤耶今夫人有疾病必求醫藥設有星命者謂壽命不可延遂信之而屏藥餌坐待其斃耶將聽命於醫以全其

生耶此理昭然無足疑者雖庸人孺子皆能知之孰謂讀書學道者反泥於是乎哉且思本之所以相勉就試者非爲干祿以榮其身以及其親與宗族也誠以古之人學聖人之道非獨善其身而止耳將推而廣之以施於天下國家也好謙之爲學實專且久而就試又二科其終惑於星命之說而無意於是乎其務積之深且厚而後爲之姑以是爲說乎區區之心好謙亮之而已教門小厄重厯慰問學道者不以外物累其靈臺好謙知我必不爲是戚也夏秋來弱質

多病俗事滿前甚無聊賴得書黃昭然易齋說後一篇真起予者比去年所見盛製此作超詣矣入山以來詩文姑錄十篇同至宰相與講明之新涼宜向學勉旃毋怠

與歐陽南陽書

昨令姪來辱書知太夫人即世匆卒奉狀申唁不敢以他辭奈孝思相距無三百里甚欲一見開我茅塞奪於多事未能也孟子云勞心者役人勞力者役於人又曰無君子莫治野人無野人莫養君子兒童時

讀此書知勞心以治人者爲貴而勞力以養人者爲賤也僕客京師時抗塵走俗足下所見未嘗不以勞力爲愧恥嘗思高蹈遠引亦足下所知也然而心甚安閑冬春之夜必然燈讀書夜分乃寢率以爲常三年來眼漸眊昏此事始廢去年承 恩洒埽玉隆意謂晨鐘暮鼓之外無一事役心惟當讀書學道以自怡悅耳入山以來田園蕪穢倉廩空虚嗷嗷待哺者日數百人執事者類皆闕葺齷齪苟度歲月無毫髮公勤心一旦更張懼駭觀聽依違與處事事曠廢挾

隱剔蠹事隨日生每撥冗開卷讀未竟一篇卽俗子  
滿前喧囂盈耳形勞神罷未有如斯之盛者曾不若  
居京師時勞力而息心之爲愈也足下氣剛而行純  
學博而才瞻長篇短章浩若河漢鏗若金石僕素所  
敬服異時常有所作詩文每欲舉似及見佳製輒羞  
縮不敢出因又得發我蒙鄙信乎友直友諒友多聞  
益矣違離二年僻處邱壑既自遠於縉紳先生凡所  
交遊未見如足下者疑義無所於析固陋無所於資  
取之而莫予益也作之而莫予正也足下知予心樂

乎否也春中過我胡乃食言秋風蕭蕭益增企慕江  
西大叅公邁先生提舉損齋先生憲幕德機先生理  
學精微作古文行古道追配古人者學者之宗師也  
足下不爲思本來寧能不爲諸公一來乎來示云左  
丞楊公參政佟公會間拳拳於僕自顧空疎何以得  
此於二相豈足下平昔揄揚之至耶客秋道古洪二  
相皆已去位今春得之傳聞相繼化爲異物矣可悼  
可悼近會省憲諸公知 中朝名賢陞擢之詳成甫  
太常同僉伯生翰待制可與中書檢校官漑之丞相



長史文苑監察御史凡此數公皆足下所厚善者聞  
之必爲之彈冠也壽體多疾謂已服雄附五十餘隻  
鹿茸一斤一見驚駭此二者性極燥烈固嘗與足下  
論之人之初生稟受元氣有強者弱者強者血氣盛  
壯弱者血氣衰微盛壯者少疾衰微者多疾理固宜  
然不幸而遭疾則必假藥石以療之疾退則已未聞  
藥石可以補益元氣如梁肉多食也大抵南方之人  
質弱者多僕素弱者多疾徃歲爲庸醫所誤服雄附  
二十餘隻初亦無他逾年疾作遍身疼痛溺赤如血

越十旬他醫進木香流氣飲百餘服乃療初無燥熱之劑皆平劑也前年冬有疾又爲庸醫所誤服雄附十餘隻疾益增天啓其衷悉屏去熱劑進木香流氣飲又百服乃療足下蓋親見之自是厥後燥熱如雄附之屬絕口不服二年中乃無疾此已試之效也足下理性甚明衛生之道胡爲迷復余懼子之服彌多其發也遲而害彌甚也今雖無他後將噬臍平生知已莫如足下故不敢不盡忠言惟高明其圖利之

聖治太平宮神龍記

至治三年冬十一月予被元檄至江州聖治太平宮  
宮中人爲予言去年夏秋之交靈雨彌月弗解乃七  
月十二日夜二鼓宮之東山相距可十里所有龍出  
焉破仙公塘並北山緣澗而西過深秀堂歐陽道士  
方寢覺山水驟至室中汨汨有聲撫床水已及席亟  
攬衣起將呼同居人走辟忽覩窓外紅光絢爛如晝  
流黃氣襲人歐陽心知其龍也即屏息立水中俄頃  
光滅水退又西過雲無心堂堂之北疊石爲牆甚堅  
壯至則徹底衝決又西壞牆壁經漆工萬榮甫兄弟

寢室中覺水及膺如溫湯方驚起有物若巨木拂床而過紅光閃爍奪人目睛瞬息間已在戶外異香芬馥良久又過齋堂後循簷而西簷十楹中一柱獨摧毀意其微轉身所觸也又過一室屋壞東西壁而出逾竹林則及澗中矣旁一室有鍛者胡道士奉母偕寢其中暴漲及席窗外紅光皆如歐陽所見又西至宮前過朝真橋澗南酒家篝燈未滅兒啼呶嗷遂違而北去經田中曲折復西乃入大溪明日視所經行草木咸無所傷惟流黃氣經日不散予師挂心淵棄

絕人事修道茲山二十年不他適主深秀歐陽師時  
跌坐別室謂所見與歐陽同予師生平無妄語是可  
信也吾聞龍必居深山大澤人迹罕至之地積數百  
千年時至氣化乃乘風雲雷雨而徙居長江大海焉  
然其名有二曰神龍曰應龍其應有二曰瑞曰妖其  
居也休徵備至人和年豐其出也不犯人畜無損室  
廬其在江海也歲爲霖雨以澤萬物斯神龍也瑞也  
其居也沴氣所感菑害並臻其出也發屋拔木傷人  
害稼其在江海也歲大旱若罔聞知日以覆舟殺人

磨牙吮血爲事斯應龍也妖也今是龍之出恂恂若  
畏辟然其爲神龍瑞應也審矣易不云乎見龍在田  
利見大人傳曰二與五應大人者君德也飛龍在天  
同聲相應同氣相求之謂也方今

天子龍飛異人間出吾知夫是龍之瑞之應賢主人  
宜當之見 宣室承龍光不遠矣是爲之記

送數學柳茂林序

數學之行于世尚矣自羲文設卦觀象聖賢間作演  
以十翼至宋布麻衣希夷堯夫探頤索隱發揮盡矣

異時予客京師公卿間言數學必以長沙魯叔寧爲  
稱首予不及知也薄遊廬山解后清江柳茂林實爲  
叔寧高第弟子推人窮通言輒奇中予於豫章天慵  
熊先生贈行詩序知之大慵爲江右儒宗重與許其  
言信而有徵然則茂林雖未得比肩麻衣輩亦見叔  
寧家學有傳矣吾聞元會運世之說包羅天地洞測  
古今安樂窩廢寥寥且二百年茂林嘗有得於是否  
行役匆匆未暇請教過我錦帷尚當與子論之

送族孫文中攜墨遊江湖詩序

墨之爲用大矣結繩始遠墳典聿興上而史館纂修  
下而文房賦詠以至閭閻市井紀錄瑣碎靡不資之  
然而世降俗薄苦良雜出隄靡之法不傳上下千數  
百年作者雖多惟韋仲將李廷珪擅名耳族孫文中  
往歲遇異人得祕法製墨頗極精妙予客京師久聞  
之而未見也去年南歸文中遠遊未返至治三年冬  
十二月拜予于玉隆出囊中墨試一用之輕清芬馥  
元光照人實佳製也質諸羣公之格物者咸謂信然  
且相率爲歌詩以美之嗟夫千里馬常有伯樂不常



有佳墨可得蕭子良潘谷不可得斯今爾來乃遇賞  
音所得不既多矣乎雖然吾猶有說惟至誠而無息  
守是道而不變將見韋李不得專美于前矣文中其  
勉之文中字元吉爲濠州史君九世孫自幼好學頗  
能詩詞亦吾宗之可進於道者必有感於斯言也

謝東碧哀詞

故王隆提點宮事教門高士東碧先生謝公洪之新  
建縣西山古源人也世爲儒家厥祖父俱有時名公  
自幼穎異未弱冠從父命爲老氏學於王隆宮師碧

潭劉先生經史百家之書靡不該綜性命之學尤所  
明達善爲文章自娛詩律清新文法條暢而已不爲  
刻深險怪語本乎天性冲澹發於篇翰理則然也貌  
莊而氣和詞婉而理勝其事上也順而不諂其接下  
也肅而不威信於朋友仁於僕隸蓋有道君子也由  
掌書記元學講師提舉知宮累遷至提點職是宮凡  
三十年人雖甚安於公而公之志未常一日不在投  
閑至治二年夏六月得請歸所居景福堂日與琴書  
爲友晨香夕燈之外無一毫役心事余聞公名久南

北驅馳暨來主玉隆始識面談笑如平生懽益信公  
名不虛得也泰定元年春正月丙申以微疾脩然而  
化春秋六十有一其徒熊君通復某某如喪父母哀  
動人人將葬遠近之人能文辭者皆代挽者作歌予  
識公雖未久而知公則深故作哀辭以誄公德以遺  
熊君以解其悲哀云其辭曰

墨名儒行兮自古所推公生儒門兮黃老是師惟經  
惟史兮造次弗違貫通古今兮何有羣疑詩詞洵美  
兮文采陸離幽居元默兮厥聞四馳執經論道兮妙

析精微鬼神奔走兮恒擁衛乎臯比仁以爲居兮弗  
崇以卑義以爲路兮弗峻以夷春蘭秋菊兮郁郁菲  
菲卿臺雲朗月兮霽霽輝輝仁者必壽兮胡然我欺  
甲子甫周兮溘埃風其遄歸厥徒蒸蒸兮惟慕師其  
以悲聲嗚悵烏合反以拂鬱兮涕泗漣漣識與不識兮  
累扼腕而歎歎夫身爲大患兮患將何施悟浮休之  
妙旨兮詎終然其肯迷嗟今之人兮識者爲誰紓悲  
哀兮作哀詞以道抑悲兮夫何思

送相師沈無庵詩序

世稱善相者自謂閱人貧富貴賤言無不中雖唐舉  
許員復生不吾若也僕南轅北轍所見殆數十百人  
率皆如是然徐察之則往往以人之禮遇厚薄爲譽  
毀久而驗其說未始不繆也因疑傳記不可盡信所  
謂唐舉許員亦若人之儔耳至大辛亥僕奉

詔代祀海岳承傳道劍江解后相師沈無庵年九十  
有八出示前朝夫士當世名賢贈行詩卷心固竒之  
言予平生得失無毫髮異臨分又謂予自此十年當  
驅馳不息一再承

恩時行李蕭然盃酒之外咸無所贈意謂已往之說  
適幸而中初不知其神也泰定改元春暮訪余玉隆  
猛憶前言若合符契噫吾今乃知唐許之術世所必  
有時以僞亂真滔滔者皆是不可多見耳翁之壽考  
甲子行且再周方將縱遊名山閱世觀象非有道之  
士能至是耶此又唐許之所未聞者再見何時尚當  
驗今日所言爲翁大序之

壽杉賦

有序

洪之丹陵觀晉寧康間神仙普惠真人鍾離

嘉故宅也仙手植二杉老幹蒼古中空外榮  
綿歷千載陵谷凡幾遷變而二杉閱世如朝  
暮豈與仙俱得道者耶遂爲之賦賦曰

繫晉代之靈迹兮彌千歲而不泯民屹鍾仙之攸宅

兮帶長江之齋目沅山莽蒼愴而糾紛兮羅萬木之

隣鄰寶夫何二杉之神怪兮異真靈與大椿嘉普

惠之手植兮狀亭亭以肺肺沛雲決烏朗切鬱以垂覆

兮爰中天之華蓋罹灰劫而益茂兮匪甘棠之能配

摧枯朽以換骨兮閱桑田之橫潰嵌空畏烏朗切佳租瑾切

神龍所蟄兮感震電之陸離崇外飾而驚世兮被綠

毛之繆參纚西憑后土以旁礴兮蟠鐵石之委逶蛇

移載蜚尤之容裔兮仰三光而蔽虧登高邱而遠望

兮聳金莖之露盤排雲氣而俯視兮眴眩龍鱗之瀾

斑巢丹鳳於赤霄兮聲噦噦烏誨切而徃還鬼神崩奔

而呵護兮何斧斤之能干沐膏澤以繁露兮恒披拂

於元風耿青瑩以燭天兮含夜氣之鴻濛晞扶桑之

拂日兮越滄海而來求嗟孔明之老柏兮終煨燼而

莫留惟茲杉之得地兮仍羽人於丹邱彼菊水能益



壽兮豈金丹之不侔望夫君兮歸來吹參差兮永懷  
永懷兮天表弄明月兮紛窈窕山峙兮川流勗貞固  
兮奚修天長兮地久期浩劫兮同休

真拙齋銘

聖門之學六藝爲先良工教子箕裘是傳爲學爲工  
維巧斯得絜厥拙人其何能格用拙存道拙非其真  
用長用大先哲攸陳莊生寓言方叔玩世苟以爲真  
亦維斯戾惟巧爲詐薄俗日滋不有真拙孰矯其非  
余子名齋真拙是扁予以銘之勗哉無覲

贈陳明元數學說

金川陳明元得堯夫數學遊江湖訪余豫章客舍議  
論英發顛倒坎離衡從古今疊疊可聽余曰元未易  
明也子能明元斯元矣且夫數之爲學本於易元之  
爲說出於老聃易與老皆聖經也而其說則異今子  
言數而徵諸元得無戾乎曰參伍錯綜通其變極其  
數齊小大辨吉凶非易傳所云乎無名天地之始有  
名萬物之母無以觀妙有以觀徼同出異名同謂之  
元非老氏所云乎用有萬變其體則同言有萬殊其

至則一余極元以明夫道窮理以衍夫數何戾之有  
噫子之說誠是矣雖然吾聞數之爲道範圍天地曲  
成萬物成變化行鬼神舒之則周流六虛卷之則洗  
心退藏非若今之言數者拘拘於吉凶禍福逐逐於  
聲利得喪也以是爲元惡得不戾夜氣寥閒月影在  
窓味義易之微言參老氏之元旨當有悟入堯夫之  
學庶乎其有傳矣子勉旃

儼齋箴

行中書省都司張君資深甫扁燕居之所曰儼哉清

江范德機爲篆二大字眉山劉損齋記之廣信彭幼  
元爲之銘資深不鄙徵予言遂作箴以獻亦古者朋  
友切切惻惻之義云

古之君子有德有言威而不猛望之儼然吾友張君  
師必先賢視聽言動無黨無偏以儼名齋肅恭是蹈  
外雖儼然溫其無暴苟失厥中不幾乎傲雖有昌言  
人孰吾告正襟危坐惟儼若思所思伊何政化是裨  
張而不弛文武不爲操之有道實儼之宜肅肅張君  
保茲令德匪惟色莊必正必直受命咸宜匡此

王國野人獻箴敢進三益

衡岳賦

五岳於中州衡山最遠而其神最靈有國家  
者歲一致祀昭彝典也

仁宗皇帝踐祚之初元思本以外史承應 中朝奉  
詔代祀夏六月乙丑至祠下瞻喬嶽之巖巖睹威儀  
之赫赫穹窿炳耀動心駭目猗歟盛哉既齋  
沐越二日丁卯行事禮成登祝融絕頂天宇  
廓清南眺九嶷北瞰洞庭嵒岿泓沚若几席

間物亦天下之奇觀也環山東西佛刹道宮  
凡數十百區往往擅泉石之勝極金碧之麗  
周覽以還賦詩三十韻留獄祠越十有五年  
重祠庭主人既不復見留題亦罔知所在矣  
因閱石碣所紀內翰疎齋盧公集賢員嶠李  
公秘書伯雍馬公奉常亨之元公平章迂軒  
趙公俱以代祀託諸詩文用彰盛美思本所  
著獨無傳焉雖才名不逮諸賢而

國之明禋神之靈貺其可無述追憶舊遊遂爲之賦

云

昔在帝姚允協重華秩四岳以作鎮視羣望而有加  
惟祝融之奧區距中州而孔遐跨洞庭之浩瀚俯蠻  
貊之鬻鬻南通五嶺北控三巴石廩岌業寶洞鎔研  
啓朱陵之秘府實炎帝之攸家鴻洞翕忽含元化以  
長養兮極蠻陬之瑰詭卓犖恢廓統地靈以磅礴兮  
匪滂霍之能比日月肩摩以旋轉兮望不周而對峙  
雲雷噴薄於山麓兮沛沅湘之溶漭空瘴癘兮海濱  
絕妖氛兮四裔伊

聖皇之御極播聲教於窮荒揆前王之踵武歲有事於南邦重廷臣之妙選發金碧於天藏於鐐

王命遵彼周行載馳載驅莫敢或遑南伯攬以承

詔察案奔而肅迎振羽衛以首路紛總總其靡寧戒

飛廉使先驅兮班陸離而啓行搏夔魍以遠屏兮忽

揮霍而宵征拖虹霓於青霄兮何旃旒之從衡也磕

雷霆以晝晦兮何鐘鼓之鏗錡也爾乃協靈辰考恒

度脩羣僚列鹵簿執豆籩陳簋簋牲牢豐禮樂具陟

降在庭賓贊有叙乾清坤夷陰闔陽煦風澁澁兮歛



來靈煌煌兮在御鑑 皇明之至仁錫繁釐於黎庶  
斯 有元之盛典宜享祀乎中古至若窮山水之奇  
觀訪仙釋之遺蹤旛幢香霽以無際金碧璀璨而爭  
雄搜靈怪之惚恍稽象罔之鴻濛達性命之元理非  
世教之攸崇豈斯文之或缺亦空言其奚庸辭曰  
祝融峩峩殿南荒只興雲致雨昭靈光只在昔巡守  
令則亡只歲修明祀開前王只輶車萬里馳康莊只  
金繒赫戲繁輝煌只欽時五福彰吾 皇只南伯祗  
若羅椒漿只牲璧既潔明德香只撞鐘考鼓聲嚶嚶

只人和禮備神具享只雲車風馬去復翔只眷眷南  
土垂休祥只蠻夷率服斯民康只吾  
皇萬壽思無疆只祝融享祀彌天長只

弔杜子美文

逾衡湘以南邁溯耒水之齋沅訪先喆之陳迹得子  
美之孤墳古木鬱以交錯穹碑摧而未泯敬祠堂於  
中野置遺像於遊塵朱子愀然作而歎曰鴻荒汗漫  
古往今來聖賢間作邈矣遼哉或興文化或樹武功  
其人雖遠聲耀無窮惟風雅之既變實王道之始衰

逮平誼之耿耿繼植榮之恢恢梁陳靡而不振隋唐  
超而莫回振大雅於流俗必天挺之英才在彼杜陵  
密依閭輔有開必先流芳恕預維嶽降神揆于初度  
篤生大賢厥聲載路繫先生之妙齡實開元之盛世  
究墳典之精微集百家之同異倡渢渢之大音偉經  
緯之奇器土苴以爲功名浮雲視其富貴登吹臺以  
結交極酣歌而肆志高稷契以自期陋雄臯而遠致  
何歲月之道忽驚素絲之爛斑竟護落以無適抱荆  
璞而長歎斯獻賦於蓬萊錫胄曹之微官屬蕙運之

中否慘氛祲於長安委妻孥以奔竄脫虎口而生還  
聆清蹕以慷慨覩漢官而沈瀾拜拾遺於倉猝補哀  
職於艱難當陳陶之喪師明相臣之無臯嬰逆鱗於  
九重斥司功於畿外徒四壁而無歸遽倉皇而顛沛  
履蜀道之險艱匪故人其誰賴將時危而事異位公  
卿而獨驕諒草堂之難久乃出峽而逍遙下荆門以  
北望慨京闕之迢迢悲湘纍之孤墳絕洞庭而遐招  
謂湖南之可依忽臯隄之羣起幸脫身而宵征復掛  
帆於湘水望九疑之嵯峨叫重華而陳理干鼎今於

未濁饋牛酒之豐美天將喪於斯文厄先生而遂已  
伊文章之得失與世運而推移耿精誠於日月貫忠  
義於虹霓豈太白之詩名敢先生而並躋斯名教之  
攸係亘萬古而相維何世儒之齷齪辨斯墳之是非  
酌清樽以長嘯與天地其無虧

### 遊廬山記

延祐三年冬余行役江淮舟過潯陽南望廬山煙雲  
卷舒積雪如畫釋舟至太平宮因訪董仙種杏壇拜  
有道心淵師游東西林寺問惠遠樂天陳迹過虎溪

登香爐峯時連日陰霾不暇周覽信宿遂行至治三  
年冬復遊太平宿留彌旬雪後正晴偕鶴臯符鍊師  
游清虛觀登天池寺夜觀文殊聖燈訪圓通大士酌  
廬山第一泉宿康王谷景德觀觀距水簾洞尚十餘  
里欣然規往道人云層厓雪消深谷石滑窮冬多虎  
不果行遊荆林市過山南撫淵明醉石浴溫泉弔靈  
溪觀三將軍祠歸宗寺羲之故居拜修靜老仙宿簡  
寂觀觀開先寺青玉峽瀑布龍湫明日當訪棲賢寺  
三峽橋五老峰三疊泉而風雪大作足倦興闌遂由

星渚問舟南歸矣廬山勝遊僅得其半不見五老峯  
是猶未識此山真面目也泰定二年春三月奉

詔訖衛元教思本乘傳播告江南秋八月甲辰次德  
安縣乙巳東行入廬山約驛人毋馳驅逢佳山水必  
解鞍登臨乃經柴桑栗里到醉石溫泉靈溪歸宗宿  
簡寂方丈丁未晦次南康驛郡守汪國良謂余明日  
過五老峰下當見尋真三疊泉而棲賢三峽橋亦茲  
山奇觀恨背馳耳余問故曰郡城西北距棲賢十里  
驛道當正北行不敢迂也九月戊申朔至五老峰下

入白鹿洞拜文公道像已酉登尋真觀五老巖巖直  
觀之西矗立萬仞雙劍諸峰環拱于右彭蠡三江交  
會於左跂若鷹揚踞若虎視夫人之俯東溟仙掌之  
薄洪河殆不是過也由觀之北五峯之東披荆榛沿  
溪行可五里得龍湫石壁嵌空洞戶深黑飛泉激射  
寒氣襲人又東北窮水源轉山麓躡巨石攀危藤彌  
高深益峻險曲折屢渡戰棹却立架木爲梁以度陡  
絕者三又十里見石崖高可百丈餘東西北峭拔無  
梯惟南通磴路仰望一水東出宛若天潢尊者云自



古未有能至其顛者莫知水之所從來也經石梁下  
流如煙如雲如縠如布可數十丈又經石梁變態萬  
狀日色晃曜如瀉明珠嵐光映帶如張貝錦又數十  
丈經日梁愈近愈明珠簾乍開銖衣縹眇鮫綃復合  
玉珮璚瑤微風動搖飛霧噴薄百步內草木皆綴金  
璫又數十丈乃赴澗中澎湃洶湧奔雷戰馬不足以  
喻其勢矣正東一石平廣高及下石梁之半遊者皆  
憇于此注目凝想澹然忘歸廬山秀甲天下而此泉  
甲於廬山信非虛語日轉山陰凜乎不可久留道人

王一山候山下具午食食已過吳章山昭德觀夜宿  
寶嚴上方庚戌復到太平會道人熊觀靜涂洞觀符  
鶴臯抵掌話舊自謂廬山佳處已得十八九三子則  
曰未見康王谷水簾樓賢三峽橋終未識廬山全體  
也噫予嘗觀古之人擅一邱一壑之勝者黃綺之於  
商山晨肇之於天台句曲之陶華山之陳皆終其身  
而弗去蓋心與道俱境與神會雖被之以黻冕享之  
以鍾鼎有不屑顧焉若矣予何人斯膠轄世故三入  
廬山幽深竒詭之邁冥搜遠覽之娛且未之既尚何

古人之敢望哉王事靡盬明發遂行姑記此以贈太  
平三子無亦使廬山之佳勝無傳焉

### 榕說

百粵之地有木焉魁梧偃蹇蓊鬱霽大或十數圍  
高百餘尺始見以爲荆揚之豫樟也迫而視之橫柯  
曲幹樛斛求乙恥枝間垂絲至地輒復爲根久益  
長大根幹連絡至有一本數十株大蔽十畝者問諸  
其人曰榕木也冬夏恒青地煖所宜若嶺北繁霜雪  
則不能植矣予心異之曰是大可爲梁棟小可爲榱

櫨構大廈需良材中州未之有也行昭梧間有根株  
摧仆枝葉委積者泥沙汨其外螻蟻室其中匠者莫  
之顧樵者莫之取也私怪而問之則曰是木也其大  
蔽天鳳凰不棲焉其深徹泉蚪龍不親焉妖狐鬼魅  
之所憑依毒虺之所穴藏人莫敢睥睨者今也幸而  
爲雷所震爲材則脫癭而速橈爲薪則渚洽而含洳  
無適可用斯亦控於地與糞土俱腐而已耳予於是  
有感焉不仁而在高位豪猾與游逋逃與歸上以罔  
其君下以賊夫民神怒而不知人怨而不恤其不爲

百粵之榕木而踣於震雷者幾希吁

廣海選論

五嶺之南列郡數十縣百有一十統於廣桂雷三大府自守令至簿尉廟堂歲遣郎官御史與行省考其歲月第其高下而遷之謂之調廣海選仕於是者政甚善不得遷中州江淮而中州江淮夫士一或貪縱不法則左遷而歸之是選焉終身不得與朝士齒雖良心善性油然而復生悔艾自新不可得已夫如是則孜孜爲利旦旦而求仇賊其民而魚肉之其志則曰

吾知豐吾財利吾子孫而已撫字非吾事也吾身之不能恤庸詎知夫吾子若孫不資是而獲仕於中州乎部使者每至必相語曰某郡瘴癘甚業邑徭獠殺人某使者行部幾不免焉則巧計而趨避之民之冤痛號呼者終於無所愬而止故地益遠而吏益暴法益賒而民益偷甚則疾視其上構結徼外蠻夷憑陵郡邑賊殺長吏之禍成矣是法也行之且五十年大府知之而莫之言也言之而莫能變也今之論者必曰

世皇混一區宇法制具興遠邇無廢小大不遺後之人循守猶恐弗及敢輕議乎嗚呼

世皇之制豈端使然哉法無不弊弊則必更明王治天下之要道也夫以海隅之於天下猶爪髮之於人身也雖微且末或拔焉或折焉則舉體爲之不安遐陬僻壤一夫不獲其所撞搪叫呼扇動遠近中州江淮之氓庸獨安乎昔者李唐之制重內輕外班生入朝以爲登仙趙宋之法遠近適均偏方一隅無足多論然則今日之事將奚師曰聖人一視而同仁篤近

而舉遠

開府大宗師張公誄

維至治元年十二月壬子開府儀同三司上卿輔成  
贊化保運元教大宗師知集賢院事領諸路道教事  
張公薨於大都崇真宮明年二月庚申嗣宗師元德  
真人吳公奉

勅戒其徒真人陳君提點薛君以喪歸于故里今  
天子即位嘉念舊臣

勅有司具葬事泰定三年冬十二月甲申葬公于南



山公官第一品宜得謚于太常元德公以公未葬弗  
敢請也門生朱思本感公既厚知公亦深懼盛德之  
或泯音民敢斯文之有缺乃作誄曰

在昔炎漢天作元輔功成不居颯翮遐舉追彼赤松  
保厥宗祀枝庶分流益大以固自河徂江乃樂茲土  
戢戢象麓清淑攸貯篤生安惠實纂洪緒康穆克紹  
奕奕侯侯禮義舟輿詩書干櫓無競於時德施斯溥  
爰暨文簡其大有容內韞修能外示樸恭既積既厚  
乃啓乃崇粵有仲子實惟我公圓精輝降方祗秀融

孝友天至允執厥中韜光隱德伯父是從眷此龍虎  
實爲公宮

世祖文武車書混同來時奮發上下雲龍密勿對揚  
曰惟清淨

帝曰俞哉克底文定遂藏竹宮式彰神應昭事上元  
期集于正曰雨曰暘無爽惟令肇錫嘉名上卿定命  
銀章錦衣以表德行安車朝夕禮異朝請僉曰休哉  
公亟音來推屏勞謙自持昭合前聖乃眷文簡試郡  
允臧于蕃于宣于浙于江赫赫厥聲煜煜其光實啓

信封俾熾俾昌伯既純雅季亦溫良晦迹彌固宜壽  
而康猶子令器聯璧爲郎剔歷中外玉振金聲曰族  
曰姻必取其長由公筮仕朱紫輝煌逮事

成廟寵錫益稠玉冠大圭周爰咨諏匪伊祀事惟道  
是求公益冲退密贊 皇猷

武皇御極無德不訓謂公元老鮮克與儔秩以特進  
位冠列侯公則引年願返丹邱

武皇曰吁卿爲

朕留勿煩以事慎爾優游授大弟子事我

明辟人亦有言弗慮胡獲其獲維何

帝命元德維此元德孝思維則實總元綱小心翼翼  
敬恭明神以佐

王國克長克承載振載奕于公有光四方是式煌煌  
仁宗恩數彌極秩亞台司賜逾萬億上逮祖考卹典  
大行遷國於魏潛德昭明八世惟師徽號誕膺厥徒  
錫類濯濯其英或秉懿德或負才名維公之故均被  
寵榮或佩銀章或錫珠璣或栖巖谷或侍

闕廷克繩祖武靡驕靡矜公則乾乾大懼滿盈祐治

之間歷事

五帝眷遇弗衰公實厭世辛酉維夏灤京告瘁元德  
克孝顓受帝祉返我神都遽絕人事維莫之冬脩然  
永逝

帝命元宰率爾多士祖道於郊哀榮亦備白雲悠悠  
元景翳翳飛雲散花縞素孔異元德攀號將奉與俱  
皇帝曰嘻爾其輔予徃送於南申飭爾徒英英冠劍  
在彼中塗靡聞不駭靡見不趨式遄其歸乃返故廬  
人亦有言曠世所無元堂未掩日居月諸王事鞅掌

朔南其居元德純孝痛甚刺膚歲在丙寅得請於

上爰

勅外廷俾以禮葬羽褒崢嶸鳳輶

音叩

宏敞白驥連

山素車彌望南山崔嵬既叶著龜靈風振音皓月流  
輝白鶴朝唳元孫夜啼我公永歸無復還期思本於  
公信撫壤接亦惟世姻幼慕明喆庚辰拜公公歸自  
北時方韶薨諸父是挈長生撫頂實懷舊恩少長學  
道素志獲伸聿來京國幸奉晨昏溫溫我公厚德深  
仁約我以禮博我以文出入

禁閨惟公所援使於四方訓辭是遵再膺

明命薦剡攸陳義則師友恩猶至親吁嗟我公胡遽而仙惟公之精兮揭日月而麗之惟公之靈兮峙山嶽而萃之惟公之道兮超元氣而出陰陽其莫追惟公之德兮蓋昭代而舉流俗其弗違蓬瀛返乎故居兮詎塵世之可縻榮華溘其朝露兮公含笑而奮飛悟莊生之微言兮齊死生於無涯苟予懷之既遠兮奚惆悵而共悲酹清尊以長嘯兮誅盛德於旒旗破羣迷於當世兮曠恨恨而不疑

貞一齋文終